

增廣山西洪洞古槐樹志

卷上
武陽署簽

書號	
卷記	二六五二七
冊	二

地750.16

213.92

21.2

圖整庫

中華民國二十年十一月

增廣山西洪洞古大槐樹志

山西洪洞積祥齋石印局代印

增廣山西洪洞古大槐樹志目錄

卷首

序

編輯姓氏表

凡例

照像

上卷

碑類

記類

歌類

行類

賦類

五古類

七古類

下卷

五言絕句類

七言絕句類

五律類

七律類

詞類

雜體類

晚香文社詩歌楹聯類

女界題詠類

楹聯類

跋

卷末

叙錄

原跋書後

認資姓名商號一覽表

增廣槐樹志名銜職務一覽表

職別 姓名 次第 籍貫

審定 柳蓉 鏡塘 代縣

棠輯 柴汝楨 幹宸 本縣

參訂 劉大升 仲棠 本縣

景寶敬 廉臣 本縣

李培棠 召卿 本縣

孫丕康 錫侯 本縣

梁培芝 紫階 襄陵

履

前署洪洞縣縣歷任房山離石等縣知事

清甲午科舉人選授文水縣教諭歷充縣公署一科科長農業學校校長

前河南延津知縣署理陽武縣知事

前充河北省軍用電話局局長

清己酉科拔貢

江蘇任用縣知事河北省政府記名縣長

洪洞商會執行委員

董軒 海明 本縣

王丕承 紹先 襄陵

景大魁 梅占 本縣

柴鴻謨 子嘉 本縣

景鍾麟 華封 本縣

繕書 孫燕翼 安軒 本縣

歷充洪洞商會正副會長現任主席

前任洪洞商會副會長現充常務委員

前清監生

山西法政專門學校法本科畢業前陵川縣承審員

山西省議會議員前壺關縣縣長

現任洪洞伯多祿學校教授

增廣山右洪洞古大槐樹志序

詩曰維桑與梓必恭敬止是故人伏處里閭鄉誼最為親切即有離鄉背井遠徙四方者或地相去千有餘里或世相隔數百餘歲遙瞻祖國臨風懷想能不依依何以故種族觀念使然也余家居披覽族譜敬悉始祖於前明洪武二年自洪洞大槐處遷代縣正下社村迄今瓜瓞綿延同族者千有餘家故國喬木身雖未至心嚮往之清光緒二十八年秋闈借地陝西以優廩生應鄉試驅車洪崖停驂郊外見古槐盤根錯節樹老心空已沈淪於蔓煙荒艸中矣洎乎民國初年充實察員爰次晉南北閭豎碑建坊煥然一新流連慨慕低徊不忍去者久之迨民國十八年秋綰符斯邦閱槐樹碑記按文獻通考明洪武永樂間有遷民遺

事余先祖碑碣年代符合本本水源信而有徵至此懷祖之深心為之大快輒欲題咏以譽嘉樹因簿書鞅掌干戈方息惟科籌餉不獲躬親其事邑紳柴君幹宸以彙輯為已任劉仲棠景廉臣李名卿孫錫侯諸君子詳加參訂余嘉其保存古蹟差幸天假之緣宦游故鄉忝為公僕歷叙先世驪歌留印他年鴻爪於戲現值大同世界一本散為萬殊四海皆是同胞民族合羣共同奮鬪異族罔敢侵畧同種日躋富強遐邇交稱曰古大槐樹關係種族揚國爭光晉乘生色彼夫召伯甘棠播仁藪而紀遺愛蜀相古柏銘勛業而寄遐思未必能若是之亘古今而不磨與天地而同流也矣是為序

民國二十年荷月代縣柳蓉序於洪洞縣政府

序二

予籍隸豫許刻僑洪洞迴憶幼居石固濱潁川饒家族之恩長遊大梁客燕代輸種族之想其民族變遷故老傳述尤所願聞每耳鄉曲父老及十數省仕商友人設曰木有水有源人有祖崑崙山脈黃河流域固我黃族太始發源地而數百年來我輩近祖蓋自洪洞大槐樹下遷出也緣歷代改革各有多殺人如麻戶口消滅獨三晉表裏山河四境安謐洪洞密邇堯都地方富庶甲於他郡故上令遷徙酌盈補虛遷民之時分派由上一姓之中同支散遣者或以鍋片作紀念或持破鏡待重圓至今時隔數百載人衍千萬家談及故里猶想念不置云云乃查文獻通考山西一省歷

朝遷民已非一次有明一代洪武永樂間因直魯豫秦等省受元末兵荒災歎居民喪亡殆盡徙太原平陽洪洞蒲絳等處人民動數十萬戶前往填殖並非專遷洪洞人也亦可分道分批往也而遠省耆老世世相傳眾口一詞僉稱自洪洞大槐樹遷來僅知有洪洞不知有他處僅知大槐樹不知生大槐樹之村莊以一縣為發祥地以一樹作遺愛品入人心之深千古不移奇矣推厥原因蓋必遷徙之時驅各屬之民聚洪洞大槐樹下由此點齊由此分遣臨別紀念永久弗忘殆無疑義故至今各省士庶之所垂詢武夫軍人之所愛護咸在斯槐增光邑乘保障我圉此誠關係民族之變遷地方之景運並見該時人民之康樂他省流離喪亡不能望

其肩背非泛泛蘭若古墟可比不可不有以表彰之也民國癸亥
甲子兩年予由滎河調署斯邑到任之初親蒞大槐樹處盤桓視
察此處在縣城北二里許之賈村霍麓在望汾流旁繞水渠縱橫
禾木暢茂遠近村落無不蕃殖所謂古大槐早已無存其遺處乃
在村中石塔前而亭之建石之立遷民勝跡得以保垂久遠者則
已故村人景爾宇先生力也先生為現任壺關縣長景華峯封翁
平日熱心公益望重鄉里彼時先生健在聞予至親出郊迎道貌
藹然招待周至厥後時相過從為予陳地方利弊皆關興革並為
述募款情形暨鳩工庀材建大槐亭暑日捨茶使行旅之經過兼
出所編古大槐樹處誌稿見示不禁歎先生眼光遠大其保存古

跡之功為不朽也嗣予調任左雲河津安邑荏苒七年近因養疴
復寓洪崖爾宇先生已作古三年矣幸大槐樹處芳蹟猶存其子
華峯治壺循聲日著古云修德獲報爾宇有焉茲孝廉柴幹宸先
生因槐志初刻無存重加彙輯擬將付印囑予為文予不敏又在
病中聊序事之巔末云

民國十九年八月許昌子敬曾廣欽序於洪寓

序三

客有自故鄉來者道及柴孝廉幹宸偕諸君子增廣我邑古大槐樹志且柳鏡塘縣長其先世自洪遷代尤力為提倡編輯告竣行將付印徵序於余余亟應之曰美哉此舉余雖謏陋烏得以不文辭哉回憶余童年束髮受書久聞古大槐樹處為前明遷民古蹟厥後肄業并門留學東瀛宦游北平久欲表彰名勝因不遑家居有志未逮不意諸君先得我心之所同然耳古云言之不文行而不遠是古蹟必待文人而後傳也明矣披覽槐志考據詳明墨花堆瓌寫景寫情宜風宜雅况此地也遠則以霍嶽為屏風近則以汾水為襟帶玉峯對峙驛路蕩平族種攸闕文獻有足徵也茲者

柴君等重加參訂仿桐城姚姬傳先生古文詞類纂體例分為十六門編成上下卷庶閱者游目騁懷恍如身臨其境而歷歷可觀也行見此志一出傳播藝林上同我洪之皋陶師曠聲名洋溢乎中國匪特蓮邦生色即晉乘亦有光矣爰綴數語冠諸簡端以誌故國喬木並仲恭敬桑梓之微忱云爾

民國辛未巧月邑人溫壽泉識於北平寓次

序四

粵稽名伯甘棠故國喬木孔明祠前古柏有道故里漢槐地以人傳山川生色此不過二三古聖先賢留遺故蹟後世考古者思其樹而不忍傷譜為詩歌發為文章尚且流連慨慕而不能去諸懷何況惓念祖邦溯木本水源能勿深情繾綣望鄉樹而欣然色喜乎此無他種族之觀念使然也余民國庚午冬月駐防是邦公餘之暇接見官紳談及古大槐樹為明代遷民遺蹟正值柴劉李景孫諸君增廣前次原志徵集詩文佳作如林條分縷析益臻完善行將付印以廣流傳俾四方咸曉祖國一編長留人間嘉樹延譽先後輝映同垂不朽余一介武夫學識固陋何敢竊附於作者之

林不過畧誌崖略藉伸景仰文獻之鄙忱並表諸君保存古蹟之雅意云爾

民國二十年仲春晉城李冠軍識於洪洞駐防陸軍第六十二團團部

序五

孫總理實行三民主義注重民族殆謂續族以成國衛國在合羣
欲團結種族必先感動鄉心此增廣槐樹志之所以不容已也民
國紀元之十稔景君爾宇棠輯槐樹志一編楨與其事志成付印
以廣流傳迄今閱十餘寒暑爾宇返道山此志不脛而走未有存
者惟是種族關係至大且遠凡當日徙居四方者惓懷先世故里
咸欲獲槐樹志一觀以為快楨擬重加編輯醵資付印遂商諸劉
君仲棠李君召卿景君廉臣孫君錫侯均樂贊成且幸代縣柳鏡
塘先生來宰洪崖越二載政成民和促楨棠輯籌款廣續石印並
言其先祖自洪遷代碑碣年代符合於戲何遇合之隆如斯耶柳

公衣錦歸鄉以洪人治洪故其關懷桑梓保存古蹟更為親切楨
獲與參訂因就原志而增廣之爰將采訪博士考據騷客吟咏參
加其中前志凡例闕如茲特補之續志一出傳播遐邇覽斯志者
再能指示疏漏郵寄佳構此尤楨所馨香以祝者也

邑人柴汝楨幹宸甫謹撰

序六

余蚤歲下帷讀書攻舉子業足不出戶庭凡本邑之名勝古蹟未嘗身歷其境游目騁懷即有耆老談及古大槐樹處為遷民薈萃之地亦漠不經心焉洎乎清光緒中葉聽鼓梁苑民國二年射策金臺越一載出宰延津陽武等縣荏苒二十餘載每與南北仕商接談聞余籍隸洪洞咸欣然色喜曰我先祖生於斯聚於斯族於斯自明洪永間遷徙茲方越數百年世世相傳皆以古大槐樹為紀念儼若甘棠遺愛永懷不忘於此見故鄉思想種族觀念遐邇皆同數典不忘祖古今有同情焉迨民國十七年退居林下緩步出望霍門外行二里許見豐碑矗立綽楔高懸後有經塔旁築茶

亭凡旅客往來游人眺望咸稱雅觀披覽古槐樹志鴻文鉅製騷客題咏其深情逸致溢於字裏行間於戲槐樹不朽矣今者復增廣原志付諸石印餉遺遠人分贈閭里俾懷祖籍者咸曉然於嘉樹之庇蔭無窮焉因附驥尾以誌崖略序云乎哉

邑人劉大升仲棠甫撰

序七

洪洞縣之北里許樹木清秀亭台參差邑故紳景君爾宇募資點綴並刊志以行之者古大槐樹處也明洪武永樂間屢向齊魯北平遷民時曾藉此為薈萃所思厥鄉先輩于于首途負囊橐冒風雨安土重遷黯然消魂其後裔偶爾返此語本源道世故情誼殷摯願覺親切有味辛亥冬客軍屢臨此士卒中眷懷祖國欣然致敬不覺紀律嚴肅地方遂獲寧謐詩曰維桑與梓必恭敬止鄉土觀念之感人何其鉅與客冬邑紳景廉臣先生由省政府軍需課課員膺順德長途總電話局局長解組歸里與邑紳柴幹宸孝廉搜輯題咏詩文各作分類石印為增廣古大槐樹志嗚呼盛矣民

國肇造以來次第建築雖周圍不遑畝而坊一碑亭一遊廊茶舍各一瀏覽風景足以豁胸襟廣眼簾供人徘徊流連况乎歷經數百年能使遐方異地飲水思源聞風者肅焉起敬吾輩生於斯長於斯得於直接間接中受無量捍衛而所謂皋陶師曠叔何諸賢聖以及韓忠定氣節范彪西理學王顧齋淹通亦藉此傳播益彰然則古大槐樹處有關於吾洪豈淺鮮耶長盛謏陋奚能為文第念景柴二紳增廣之舉懃懃懇懇大有不可泯滅者在爰序數言書之簡端

庚午殘臘念三日邑人楊長盛茂齋甫序

增廣山西洪洞古大槐樹志序

洪洞號三晉壯縣昔周有天下於此置楊國以命伯僑後併晉歸羊舌肸僑周室懿親肸晉官俊父非食豐不足以昭懋賞則洪為膏腴或三代而已然矣夫人情莫不趨美利而惡最塞霍之陽汾之淵有潤田焉又當冠蓋往來之衝其能不為人羣所集乎顧天下事以是困者以是通以是合者以是離古今盈虛消長之理然也洪民之遷其亦由斯道歟古大槐樹者邑喬木也其底一掌地也舉其民不足以成聚况移以實大陸然而洪民遷矣且遷非一次矣迄今五百年北至塞南抵淮西洛東海瀰漫者皆是也此何說也蓋始遷者洪人繼遷者不盡洪人以大槐樹底為稽籍發憑

之所遷人所集遂盡隸槐樹耳因長思之殷之遷民也避河患也秦之遷民也處罪人也漢之遷民也防隱憂也秦漢不必論若夫殷盤庚者非賢君子河決者非顯患乎乃遷令初頒民怨即涕至於率籲眾虞懼之以戎毒脅之以剝刑僅乃從命則甚矣離鄉背井之難也明之遷民與殷秦漢殊然不適有居咨嗟怫鬱之狀豈有異哉是知遷民者非人情之所願也而既遷之後父以是語子兄以是語弟望家山而不見流異域以沾襟不但身不能忘百世子孫亦繫之矣漢高平鯨布反過沛謂沛父老曰游子悲故鄉吾雖都關中千秋萬歲後魂魄猶在沛貴為天子富有四海人生榮樂茂以加已而不能忘鄉况平人乎况去樂土之洪民乎是書本

甘棠勿翦之懷發桑梓敬恭之義闡揚民族別具苦心創者景君
爾宇續者柴君幹宸劉君仲棠等諸人當重付梓時適余權洪篆
又適值二十九軍過境軍多燕魯皖豫人到洪必遊槐樹故址曰
吾老家也因流連不忍去與辛亥三鎮兵過洪之情狀同此事余
親見之余不能無感因握管輒書數語於簡端以誌其崖畧如此
中華民國二十年十月

晉城郭象蒙春泉甫譔

增廣山西洪洞古大槐樹志序

今之識時務俊傑相聚而談曰民為邦本立國首在衛民衛民必先合羣合羣之道安在須知人本乎祖木本水源家族合成宗族合成國族今茲增廣槐志蓋聯絡種族之義也余稽文獻通考明洪武永樂間屢徙山西民於滁和北平山東河南保安等處以樹下為薈萃之所迄今時之相隔也五百有餘歲地之相去也數千有餘里所至之處生齒繁衍後世子孫咸有故國喬木之思是當日移民之策原為殖民而版圖日廣樹木之計因樹人而嘉名益彰然古今鄉心皆同中外時勢各異余於此不能無感焉慨自海禁宏開我華人僑居他邦非我族類其心必異初則利用繼則壓制歐風美雨逼迫太甚不得已屈服於列強權勢之下弗獲自由平等

賦黃鳥以興歎言旋言歸復我邦族是華人遠適異國所在皆為危境洪民遷徙中邦到處盡屬樂郊何大相懸殊如斯也余籍隸中州毗連晉疆故鄉父老談及先世多自洪崖古大槐樹遷來余嘗聞其語矣及余筮仕晉國旋即作宰安澤道出洪境訪尋古蹟厥後歷任平陸解梁縣長荏苒十餘載客冬館符斯邦甫下車督辦保衛團練巡行北郭見有亭翼然有坊岿然霍嶽北峙汾水西流天然畫圖蔚然深秀洵屬揚國之大觀也更有足留紀念者大軍迭次過境強半直魯豫各省健兒到此齊呼曰吾家山也恭敬桑梓秋毫不犯是實有禦災捍患之功非徒為游目騁懷之地也時值邑紳柴廣文幹宸增廣槐志彙輯成編問序於余余特誌其原委宛若韓宣譽延嘉樹召伯愛遺甘棠云爾

民國二十一年二月中和節

新野海鵬運靜波甫撰

古大槐樹志序

宋范文公白鰲憂邊而憐之於圭峯精舍此一人一家之事尚不能忘情况驅數千戶人民使之離故土適異鄉能不黯然神傷乎乔木而依依不已乎此古大槐樹所以見稱於明清兩代至今而流傳愈彰也年湮代遠古槐已斃於劫火民國開幕景君瀛宇辭組歸田所至之地凡遇齊魯江淮出燕人士莫不以大槐為問知種族之觀念歷久不忘乃募資創立石碣題曰古大槐樹處使適客停驂興其木本水源之思雖逆旅而思歸故鄉焉初創輯槐志徵集名作雄筆麗藻弘篇鉅製積成卷軸現已告存老友韓宸榮君復以增廣槐志為已任石印裝訂以廣流傳向序於余余以年老學業敢言風雅幸側身其間執校讎之役得附驥於大吟詠之海爰叙其顛末以次

民國二十一年二月

邑人劉大觀序於春暉軒

增廣山西洪洞大槐樹志序

曠觀古今中外歷史國勢之強弱視乎民族之盛衰尤賴具遠識者為之提倡有以感動鄉心聯絡團體貫徹愛國愛羣之宗旨以角雄於地球之上乃不受列強侵略是知種族之關係大矣哉余籍隸軋壁先君尊三公服賈洪崖懷章子趙教經庭早聞遷民名蹟厥後續承父志立洪經商有年忝任商會常務委員雖異鄉宛若同鄉焉茲韓宸先生增廣槐志余聞之奮袂而起曰美哉此舉俾當日遷徙四方者快觀此編莫不追溯本本懷懷故國合群衛國之心淳然而興焉由是民族富強民國鞏固余將引領望之矣

民國壬申仲春之吉

襄陵王丕承銘先甫謹序